

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haberri

BESPLATAN PRIMJERAK ● MART, 2021., broj 49.



**DAN NEZAVISNOSTI**  
**Bosne i Hercegovine:**  
Stablo kao simbol života

- 2-4 Obilježavanje Dana nezavisnosti  
5 Načelnik dobitnik jubilarne nagrade za životno djelo  
8-9 Zborovi građana  
12-13 Saradnja Općine i Pomozi.ba  
14-15 Infrastruktura  
16-17 Obrazovanje  
20-21 Predstavljamo firmu "Paja taxi"



## Impressum

- Izdavač:** Općina Stari Grad Sarajevo  
**Pripremili:** Almedina Porča  
Alma Imamović  
Jasenko Jašarević  
Nedim Šahović  
**DTP:** Safet Mališević  
**Fotografije:** Safet Mališević  
Nedim Šahović  
**Štampa:** Inelex d.o.o.  
**Tiraž:** 3000  
**Adresa:** Zelenih beretki br. 4  
71000 Sarajevo  
**web:** www.starigrad.ba  
**e-mail:** info@starigrad.ba  
**Telefon:** +387 33 282 491



## Obilježavanja

# Dan nezavisnosti BiH: Stablo kao simbol života i korijena za budućnost



Zasađena lipa na višenamjenskom trgu

**Načelnik Hadžibajrić zasađio stablo lipe sa mladim ljudima koji predstavljaju ponos ove lokalne zajednice ● Sve što radimo je za boljitak domovine i svoje lokalne zajednice ● U ovoj općini se branila Bosna i Hercegovina**

**D**an nezavisnosti Bosne i Hercegovine u općini Stari Grad simbolično je obilježen sadnjom stabla na mjestu gdje je 01. marta, prije godinu dana, održana velika svečanost i ozvaničen završetak četiri kapitalna projekta Općine Stari Grad. Tog 01. marta, 2020. godine otvorena je prva javna podzemna garaža i najveći višenamjenski trg u Kantonu Sarajevo u ulici Avdage Šahinagića.

**Drvo je simbol života, pruža korijene za budućnosti**

U društvu mladih ljudi koji predstavljaju ponos ove lokalne zajednice i primjer su kako se svojim radom i trudom mogu postići veliki rezultati, općinski načelnik mr Ibrahim Hadžibajrić zasađio je stablo lipe na zelenoj površini iznad podzemne garaže. Drvo je simbol života, ono nas štiti i čuva, pruža korijene za budućnost i nove generacije koje dolaze. Obaveza

Priča sa naslovne strane



*Načelnik Hadžibajrić sa uspješnim mladim ljudima iz Starog Grada*

svakog patriote, pojedinca i kolektiva, jeste da u granicama svojih mogućnosti aktivno doprinosi očuvanju i afirmaciji naših tekovina, kao i postizanju sveukupnog napretka.

“Sretni smo što naša lokalna zajednica ima uspješne mlade ljude koji se izdvajaju svojim rezultatima u oblasti nauke, kulture, sporta i na svim drugim poljima. Oni su najbolji primjer kako se voli svoja domovina i gradi život u njoj, a mi kao lokalna zajednica smo uz njih i pomažemo im na njihovom putu. Drvo koje smo zajedno posadili simbol je života i stajat će u znak sjećanja na sve ono što su naša zemlja i njeni građani preživjeli u ne tako dalekoj prošlosti,” poručio je općinski načelnik mr Ibrahim Hadžibajrić.

### Sve što radimo treba biti za boljitak naše domovine

U ovom simboličnom činu sadnje stabla načelniku Hadžibajriću pridružili su se Hamza Turulja osvajač srebrne medalje u karateu na svjetskom prvenstvu u Čileu

i najbolji mladi sportista Bosne i Hercegovine u 2020. godini, zatim Lamija Vrnjak, studentica Elektrotehničkog fakulteta u Sarajevu s prosjekom ocjena 9,16 zbog čega joj je pripala ‘srebrna značka’ Univerziteta u Sarajevu i Samir Mirvić, član KUD Baščaršija, najpoznatijeg i najreprezentativnijeg kulturno-umjetničkog društva s tradicijom dugom 74 godine.

Uz čestitke svim građanima povodom Dana nezavisnosti, Lamija Vrnjak je kazala da joj je bila čast učestvovati u ovoj akciji. „Drago mi je što sam bila u društvu načelnika koji je uvijek bio tu da prepozna uspjeh mladih ljudi i da to nagradi. Moj lični uspjeh je to što sam završila Elektrotehnički fakultet i postala sam ‘srebrna značka’ na osnovu svog uspjeha, truda i prosjeka. Lokalna zajednica je to prepoznala i drago mi je što sam ovdje na Dan nezavisnosti, dan koji je jedan od najznačajnijih datuma u modernoj historiji Bosne i Hercegovine i koji me uvijek podsjeti da sve ono što radim

treba da radim za boljitak svoje domovine i za boljitak svoje lokalne zajednice,“ poručila je Lamija.

### Čast je biti među uspješnim ljudima

“Velika je čast biti pozvan na ovakav događaj i biti među uspješnim ljudima naše općine. Zahvalio bi se načelniku Hadžibajriću koji je uvijek uz nas i pokazuje koliko je zaista važna pomoć lokalne zajednice svima nama. Trebali bi nam pomoći i viši nivoi vlasti, ali to nije tako dok načelnik uvijek nađe načina da nam pomogne kako bi lakše učestvovali na takmičenjima“, izjavio je Hamza inače stipendista Općine Stari Grad zbog svojih izuzetnih zasluga i rezultata.

Samir Mirvić iz kulturno-umjetničkog društva Baščaršija istakao je da ove godine slave 74 godine postojanja i njegovanja kulturne baštine i tradicije svih naroda i narodnosti u BiH. „To je zaista jedan pravi način iskazivanja ljubavi prema domovini i prije svega uključivanja

## Obilježavanja



Sa predstavnicima boračkih udruženja iz Starog Grada

mladih u naše aktivnosti. Želim da se zahvalim Općini Stari Grad koja zaista pomaže rad KUD Bašćaršija i samim tim promoviše njegovanje kulturne baštine i tradicije, kao i okupljanje mladih osoba u udruženja ovakvog tipa," rekao je Samir.

### Prijem za predstavnike boračkih udruženja

Tog dana općinski načelnik mr Ibrahim Hadžibajrić održao je prijem za predstavnike boračkih udruženja iz općine Stari Grad. Uz prigodna obraćanja, u Velikoj sali Općine stari Grad učesnici su govorili o značaju ovog datuma za cijelu Bosnu i Hercegovinu, kao i samoj ulozi Općine Stari Grad u periodu od 1992-1995. godine.

"Moramo biti ponosni na svoju državu Bosnu i Hercegovinu, na svoj grad i na ovu općinu jer u ovoj općini se branila Bosna i Hercegovina. Ovdje je bivši predsjednik, rahmetli Alija Izetbegović, u periodu od 1992. do 1995. godine provodio više vremena nego u Predsjedništvu. Odavde je sve kretalo, ova općina je bila pokretač i motorna snaga. Ovo je jezgro," izjavio je općinski načelnik Hadžibajrić.

Na prijemu se obratio i Enes Bezdob,

tadašnji načelnik Policijske stanice Stari Grad, koji je govorio o svojim sjećanjima na referendum 01. marta, ali i o periodu agresije.

"Uvijek sam govorio, čak sam i pisao o tome, da je u BiH rat počeo 1991. godine, čak i prije. Oružani sukobi su počeli '91 godine, dole u Hercegovini, sad je to Općina Ravno, koja je bila spaljena. Do Sarajeva su dolazile te informacije, ali



Mališani iz vrtića "Pčelica" sa Hadžibajrićem

### Vrtić "Pčelica" u posjeti Općini

Djeca iz Vrtića "Pčelica", predškolarci uzrasta do šest godina, u pratnji svojih odgajateljica, posjetili su povodom Dana nezavisnosti općinskog načelnika mr Ibrahima Hadžibajrića. Uz veselu dječiju graju, pjesmice i osmijehe ispričali su sve što oni znaju o Danu nezavisnosti i ponosno izrecitovali pjesmice koje su naučili za ovu priliku. Druženje sa općinskim načelnikom iskoristili su i da postavljaju pitanja koja su uobičajena za njihov uzrast, od toga šta je posao načelnika, pa do pitanja o tome šta je stipendija, video platno i džeparac. Ipak, ono što ih je najviše obradovalo su pokloni koje su dobili prilikom posjete načelniku.



Članovi KUD "Bašćaršija"

mnogi još nisu ni vjerovali, ni znali šta se dešava. Bila je to jedna zbunjenost, a u stvari se radilo o dugoročnoj strategiji s utvrđenim ciljevima onih snaga koji su željele i još uvijek pokušavaju da dezintegrišu Bosnu da je raskomadaju," kazao je Bezdob.

# Načelnik Hadžibajrić dobitnik jubilarne nagrade za životno djelo

**Nagrada za izvanredne rezultate u razvoju Općine Stari Grad • Nagradu dodijelio Evropski nezavisni žiri**  
**• U budućnosti nastaviti s uspješnim radom**

Općinski načelnik mr Ibrahim Hadžibajrić dobitnik je jubilarne nagrade za životno djelo za izvanredne rezultate u razvoju Općine Stari Grad i stvaranje ambijenta za biznis, doprinos afirmaciji općine, kontinuirano ulaganje u infrastrukturu i dugogodišnje prosperitetno vođenje Općine u interesu građana i biznisa.

Jubilarna nagrada načelniku Hadžibajriću uručena je na dodjeli Agencije za izbor najmenadžera BiH, Jugoistočne i Srednje Evrope, održanoj u Hotelu Holiday, 17. februara, 2021. godine.

Evropski nezavisni žiri, sastavljen od uglednih evropskih i svjetskih menadžera, naučnih i javnih radnika, te ranijih dobitnika nagrade sa šireg prostora regiona, donio je jednoglasnu odluku o dodjeli jubilarne nagrade za životno djelo općinskom načelniku mr Ibrahimu Hadžibajriću zbog izuzetnih zasluga za razvoj Općine Stari Grad, te za regionalnu, kulturnu i prijateljsku saradnju sa drugim općinama, gradovima i državama, kao i za konkretne rezultate rada i doprinos dugogodišnjem razvoju ove općine.



*Nagrada za životno djelo za izvanredne rezultate rada*

## Kafa s novinarima

Povodom ovog značajnog priznanja načelnik Hadžibajrić upriličio je "Kafu sa novinarima" 18. februara, u Restoranu Libertas. Našalivši se da je na našim prostorima običaj da se ovakve nagrade dodjeljuju na kraju života, načelnik je izrazio veliku zahvalnost svima onima koji su prepoznali njegov predan i požrtvovan rad za dobrobit ove lokalne zajednice i njenih građana.

"Vjerujem da je ova nagrada rezultat prepoznavanja mog rada u prethodnih 12 godina od strane građana. Zahvalju-

jem svima koji su doprinijeli ovakvom priznanju, jer bez podrške određenih ljudi i općinskog menadžmenta ni ja ne bih mogao postizati ovakve rezultate. Nadam se da ćemo opravdati povjerenje i u budućnosti nastaviti sa ovako uspješnim radom," izjavio je načelnik Hadžibajrić.

Jubilarnoj nagradi za životno djelo u prethodnim godinama prethodila su dva priznanja za Najnačelnika u BiH, priznanje za Evropskog načelnika FBiH, Načelnika decenije u BiH, Večernjakov pečat, te priznanje za Evropskog najnačelnika decenije koje mu je pripalo prije dvije godine.



*Sa pripadnicima "sedme sile"*

## Projekti



# Prva općina u antikoruptivnom sistemu Kantona Sarajevo

**Hadžibajrić i Kafedžić potpisali sporazum • Podaci o uposlenicima, javnim nabavkama, imenovanim licima**

**P**otpisivanjem sporazuma o saradnji na zajedničkim aktivnostima na prevenciji i borbi protiv korupcije, između općinskog načelnika mr Ibrahima Hadžibajrića i direktora Ureda za borbu protiv korupcije i upravljanje kvalitetom u KS Erduana Kafedžića, Općina Stari Grad postala je prva općina u KS koja je dio jedinstvenog antikoruptivnog sistema u KS.

Upravo to je potvrdio i direktor Kafedžić, kazavši da je ovo historijski trenutak u KS i pohvalivši proaktivno djelovanje ove lokalne zajednice, imajući u vidu da je općinski načelnik inicirao što brže uvođenje Općine Stari Grad u sistem Ureda za borbu protiv korupcije.

“Vrlo je važno reći da u vremenu cijepanja država i važnih procesa u BiH, idemo ka centralizaciji najvažnijih procesa za BiH, a to je prevencija i borba protiv korupcije. Općina Stari Grad je prva općina koja potpisuje sporazum. Na ovaj način će se moći nadgledati svi zaposleni, imenovana lica i javne nabavke. Zahvaljujem se načelniku na proaktivnom djelovanju na način da je inicirao da se ovo što prije uvede u sistem,” najavio je Kafedžić.

## Svi podaci će biti na jednom mjestu

Dogovor o pristupanju Općine Stari Grad antikoruptivnom sistemu postignut je početkom januara ove godine, ali načelnik Hadžibajrić podsjeća da je Općina Stari Grad tu ideju prihvatila još prije dvije godine. “Moram reći da smo mi prije dvije godine prihvatili da se pridružimo sistemu i bili jedina općina koja je prihvatila inicijativu, ali nažalost to tada nije zaživjelo,” kazao je Hadžibajrić.

### Podaci će biti javno dostupni

U jedinstvene registre Ureda za borbu protiv korupcije i upravljanje kvalitetom KS bit će uneseni podaci o zaposlenim državnim službenicima i namještenicima u Općini Stari Grad, javnim nabavkama koje se provode, te imenovanim licima. Podaci će biti javno dostupni na stranici <https://www.anticorruptiks.com/>, kao i putem linka na općinskoj stranici [www.starigrad.ba](http://www.starigrad.ba).

“Za nas, kao jedinicu lokalne samouprave, ovo ne predstavlja ništa novo već je samo sublimacija svih naših aktivnosti koje smo do sada radili. Registar javnih nabavki je već postojao na našoj web stranici i sve je bilo transparentno, ali sada ćemo kroz jedan jedinstven program moći to da prenesemo i u Ured za borbu protiv korupcije i svi podaci će se nalaziti na jednom mjestu, pa će ih sa tehničkog aspekta biti puno lakše pratiti,” kazao je Hadžibajrić.



Registri Ureda za borbu protiv korupcije

# Izdvojeno 15.000 KM za pomoć Roditeljskoj kući u Sarajevu

**Od izgradnje Roditeljske kuće do danas izdvojena pomoć od 40.000 KM • Drugi dom za oboljelu djecu i njihove porodice • Usmjeravamo sredstva na socijalno ugrožene i bolesne**

**U**prkos teškoj ekonomskoj situaciji i izazovima koje je pred sve nas stavila pandemija korona virusa, općinski načelnik mr Ibrahim Hadžibajrić i predsjednik Udruženja 'Srce za djecu oboljelu od raka' Fikret Kubat potpisali su početkom marta ugovor o podršci radu Roditeljske kuće u Sarajevu, uvećan na 15.000 KM za ovu godinu.

“I ranije sam najavljavao da ćemo budžetska sredstva iz 2021. godine usmjeravati na najugroženije kategorije kao što su socijalno ugroženi i bolesni, a ovdje se konkretno radi o djeci oboljeloj od raka. Imajući u vidu cjelokupnu situaciju prioritet u radu su nam građani i kako pomoći ljudima da prebrode ovu krizu. Od momenta kada je napravljena Roditeljska kuća pružali smo im podršku i ranije je to bio iznos od 10.000 KM godišnje, dok je ove godine uvećan za dodatnih 5.000 KM. Iskreno se nadam da ćemo olakšati boravak i liječenje dječici i njihovim roditeljima,“ poručio je načelnik Hadžibajrić.

## Ostati zajedno u teškim vremenima

Podrška Udruženju “Srce za djecu oboljelu od raka” i Roditeljskoj kući traje od 2016. godine a na taj način ova lokalna zajednica pruža oboljeloj djeci i njihovim porodicama drugi dom, porodičnu atmosferu i mjesto, na kojem bar na trenutak, mogu zaboraviti na bolničko liječenje. Kroz budžet Općine Stari Grad za podršku radu Roditeljske kuće dosad su izdvojena sredstva u iznosu od 40.000 KM.

„U vrijeme pandemije kada su naša dječica možda i najosjetljivija i najrizičnija kategorija veoma je važno u ovakvim momentima ostati uz njih, tako da Općina Stari Grad i općinski načelnik Hadžibajrić ovim grantom koji je čak i povećan na 15.000 KM pokazuju da su



*Kubat uručio zahvalnicu Hadžibajriću*

uz našu dječicu, uz naše male heroje,“ izjavio je Kubat. „Moramo ostati zajedno u ovim teškim vremenima, moramo imati solidarnosti, empatije, humanosti, jer je vrlo važno u ovako teškim trenucima da imate prijatelje kao što je Općina Stari Grad koja je pružila primjer i drugim općinama u Federaciji BiH na koji način i kako treba pružiti podršku,“ dodao je.

### Podržana akcija „Budi zlatan“

Prošle godine uposlenici Općine Stari Grad dali su svoj doprinos akciji Udruženja “Srce za djecu oboljelu od raka” „Budi zlatan“ kupovinom 220 zaštitnih maski, a cjelokupan iznos je doniran za podršku djeci oboljeloj od raka širom Bosne i Hercegovine.

Za podršku u radu udruženja “Srce za djecu oboljelu od raka”, predsjednik udruženja Fikret Kubat uručio je zahvalnicu općinskom načelniku Ibrahimu Hadžibajriću.



*ARHIV: Prilikom posjete Roditeljskoj kući 2017. god.*



*Uposlenici Općine kupili maske "Budi zlatan"*

## Zborovi građana



## Načelnik Hadžibajrić sa saradnicima obišao mjesne zajednice u Starom Gradu

**Nastavljena otvorena i direktna komunikacija sa građanima ove općine, prilagođena epidemiološkoj situaciji ● Manji zahtjevi će biti odmah riješeni ● Ostali zahtjevi će se rješavati u narednom periodu**

Od polovine januara do početka marta ove godine, općinski načelnik mr Ibrahimom Hadžibajrićem sa svojim najbližima saradnicima i predsjedavajućim Općinskog vijeća Stari Grad dr.sc. Mirzom Batalovićem, posjetili su svih 16 mjesnih zajednica u Starom Gradu. Na održanim zborovima su predstavljene ranije aktivnosti, najavljeni budući projekti, te najavljeno da će se nastojati djelovati u pravcu rješavanja problema svih građana.

### Moramo biti svjesni teškog vremena u kojem se nalazimo

Načelnik Hadžibajrić kazao je građanima da je sa svojim najbližim saradnicima odlučio posjetiti sve mjesne zajednice nakon Lokalnih izbora održanih u novembru na kojima su mu građani Starog Grada po četvrti put dali svoje povjerenje. „Od svog prvog dana na ovoj funkciji mnogo puta sam bio u svim mjesnim zajednicama. Velika sredstva su

uložena u infrastrukturu i kvalitet života u Starom Gradu, međutim moramo biti svjesni teškog vremena u kojem živimo i koje nas očekuje. To znači da brojni zahtjevi neće moći biti ispunjeni, jer je potrebno da se uključe i kantonalne institucije, preduzeća, na koje i vi građani morate izvršiti određeni pritisak, a ne da

očekujete kako će samo Općina riješiti sve probleme“, poručio je načelnik Hadžibajrić.

Predsjedavajući Općinskog vijeća Stari Grad dr.sc. Mirza Batalović pojasnio je građanima da je zbog pandemije korona virusa budžet Općine Stari Grad manji za čak milion KM: „Situacija sa pandemijom korona virusa je krajnje neizvjesna, novca će možda biti i manje. U tom slučaju sve svoje snage ćemo usmjeriti kako bi pomogli onima koji nemaju osnovnih sredstava za život, niti ih mogu zaraditi zbog pandemije“, rekao je predsjedavajući Batalović.

#### Nastavak sanacije ulice Savjet-bega Bašagića

Od projekata koji su planirani za realizaciju 2021. godine najavljeno je: rekonstrukcija Trga oslobođenja - Alija Izetbegović koji će postati jedno od najreprezentativnijih mjesta u gradu; izgradnja nove vodovodne i kanalizacione mreže kroz ulice Alifakovac, Maguda, Megara čikma i dijelove ulica Isa bega Ishakovića i Veliki Alifakovac; rekonstrukcija ulica Za beglukom i Bjelavica; sanacija ulice Braće Muhić; nastavak sanacije jedne od najdužih ulica u Starom Gradu, a to je ulica Savjet-bega Bašagića na dijelu od broja 143 do 161.



*U planu je nastavak sanacije Savjet-bega Bašagića*



## Građani pohvalili ovakav vid komunikacije

Svi građani koji su se odazvali pohvalili su ovakav način komunikacije i opredjeljenje općinskog načelnika i općinskih službi da izađu među građane i saslušaju njihove probleme.

Zahtjevi i pitanja građana evidentirani su i upisani uz njihove kontakt podatke kako bi im nadležne službe u što skorijem roku odgovorile.

Najveći broj zahtjeva odnosio se na asfaltiranje, sanaciju stepeništa i kaldrma, izgradnju potpornih zidova, sanaciju stambenih jedinica i drugo. Ovi zahtjevi poslužit će da se u narednom periodu izvrši obilazak lokacija, utvrdi njihova opravdanost i pristupi rješavanju, a dijelom će biti osnova za izradu Nacrta budžeta za narednu godinu.

Građani su istakli i dobro poznati problem nepropisnog parkiranja u starogradskoj jezgri, te predložili postavljanje ograda na više lokacija, prijavili su znatan broj nelegalnih deponija širom Starog Grada, te se žalili na zimsko održavanje ulica u mahalama.

Kako je istakao općinski načelnik mr Ibrahim Hadžibajrić na jednom od zborova, manji zahtjevi će biti odmah riješeni, ali će veliki broj zahtjeva biti prosljeđen drugim, nadležnim javnim preduzećima i organima. „Obišli smo sve naše mjesne zajednice i posjetio nas je veliki broj građana. Dosta toga ćemo odmah riješiti, kao što je postavljanje kanti za otpad, krčenje šiblja, sječa stabala, zamjena oštećene rasvjete. Ostale zahtjeve ćemo rješavati u narednom periodu, ali u skladu sa budžetskim mogućnostima,“ kazao je načelnik Hadžibajrić.



Građani iznosili prijedloge



Sa građanima mjesne zajednice Vratnik

### Neki od projekata koji će biti realizovani ove godine

Najviše pažnje bit će posvećeno infrastrukturi, pa su u 2021. godini u planu: rekonstrukcija kanalizacione mreže u ulici Arapova; rekonstrukcija kanalizacione mreže u ulici Mačkareva uz sanaciju kaldrme u gornjem dijelu ulice i asfaltiranje donjeg dijela; rekonstrukcija dijela ulice Višegradska kapija; sanacija ulice Nafije Sarajlić i Poddžephana; sanacija kaldrme u ulici Mehmedagina itd. Većina projekata zahtijeva ogromna finansijska sredstva, koje Općina Stari Grad ne može sama osigurati. Dogovoreno je da u nekim od projekata finansijski učestvuju Ministarstvo za saobraćaj Kantona Sarajevo i Direkcija za puteve Kantona Sarajevo.



Sanirat će se ulica Arapova, uz rekonstrukciju kanalizacione mreže

## Općinsko vijeće

# Konstituirajuća sjednica Općinskog vijeća Stari Grad

Konstituirajuća sjednica Općinskog vijeća Stari Grad Sarajevo, na kojoj su novoizabrani vijećnici položili svečanu izjavu, održana je 29. decembra, 2020. godine. Na taj način, Općinsko vijeće Stari Grad prvo je konstituisano vijeće u Kantonu Sarajevo.

Na ovoj sjednici za predsjedavajućeg Općinskog vijeća izabran je dr.sc. Mirza Batalović (NBL), a za zamjenike predsjedavajućeg Malik Garibija (SDP) i Damir Saračević (NiP).

Batalović se u svom prvom obraćanju u Općinskom vijeću zahvalio građanima koji su mu dali povjerenje na izborima i vijećnicima koji su ga izglasali na poziciju predsjedavajućeg.

„Vjerujem kako ćemo kao Općinsko vijeće konstruktivno raditi, te da ćemo svojim angažmanom olakšati rad Općinskom načelniku, a sve s ciljem pružanja pomoći i podrške našim građanima i realizacije projekata koji su od iznimnog značaja za stanovništvo ove jedinice lokalne samouprave“, poručio je Batalović, koji će poziciju predsjedavajućeg u ovom mandatu obnašati volonterski.

Općinsko vijeće Stari Grad u narednom četverogodišnjem mandatu činit će 31 vijećnik iz devet političkih partija. Sedam vijećničkih mandata osvojila je NBL, pet NiP, tri SDP, po dva Naša stranka i Plat-



*Predsjedavajući Batalović sa zamjenicima Garibijom i Saračevićem*

forma za progres, a jedan mandat pripao je Liberalno demokratskoj stranci. SDA je osvojila sedam mandata u Općinskom vijeću Stari Grad, a Savez za Stari Grad i SBB po dva mandata. Najviše osvojenih glasova u Općini Stari Grad, na Lokalnim izborima u BiH, imala je Nezavisna bosanskohercegovačka lista (NBL).

Jedna od tačaka bila je i obraćanje općinskog načelnika mr. Ibrahima

Hadžibajrića. I ovaj mandat posvetit ću građanima, odnosno realizaciji projekata na terenu koji će biti namijenjeni isključivo unaprijeđenju kvalitete i standarda življenja svih građana. Vjerujem da, u saradnji sa Općinskim vijećem, možemo napraviti izvanredne rezultate i da ćemo zajedničkim radom i požrtvovanošću prevazići težak period koji je pred nama“, naglasio je načelnik Hadžibajrić.

## Vanredna sjednica Općinskog vijeća

Vanredna sjednica Općinskog vijeća s ciljem glasanja za utvrđene kandidatske liste za izbor vijećnika iz Općinskog vijeća Stari Grad za Gradsko vijeće Grada Sarajevo održana je 26. januara, 2021. godine. Na početku sjednice predsjedavajući je pojasnio je da će proceduru glasanja provesti Komisija za izbor i imenovanje, koju čine: Seid Škaljić, Lejla Begović, Anisa Bašović - Čengić, Muamer Mekić, Jasmin Skorupan, Šejla Uzunović, Zlatan Ljuhar, Sabahudin Arapović i Husein Holjan. Vijećnici su, poštujući proceduru glasanja, prvo preuzimali listiće i potpisivali se, a potom tajno glasali u kabini za



*Izbor vijećnika za Gradsko vijeće*

glasanje i ubacivali glasački listić u kutiju. Nakon prebrojavanja glasačkih listića, predsjednik Komisije je objavio rezultate: kandidatska lista političke stranke Nezavisna bosanskohercegovačka lista - 8 glasova; kandidatska lista grupe vijećnika: Deljković, Džino, Simonović, Zahiragić, Krivić i Smajović - 8 glasova; kandidatska lista grupe vijećnika: Miladin, Dodik, Jašarević, Zukorlić - Pašalić, Uzunović, Bićo i Saračević - 8 glasova; kandidatska lista grupe vijećnika: Skaka, Šahović i Išerić - 0 glasova i kandidatska lista grupe vijećnika: Mekić, Skorupan, Garibija, Čengić - Bašović - 7 glasova.

## 1. sjednica

### Općinskog vijeća

Prva redovna sjednica novog saziva Općinskog vijeća Stari Grad održana je 28. januara, 2021. godine. Tokom višesatnog zasjedanja i rasprava, Općinsko vijeće je donijelo nekoliko značajnih odluka.

Jednoglasno je prihvaćen prijedlog predlagača, općinskog načelnika mr Ibrahima Hadžibajrića o umanjnju zakupnina svim zanatlijama i obrtnicima koji djeluju u poslovnim prostorima u vlasništvu Općine Stari Grad. Odlukom je predviđeno da im se zakupnine umanje za 95% u periodu od 01.01 do 01.08.2021. godine.

Općinsko vijeće je raspravljalo i o rješavanju imovinsko-pravnih odnosa u predmetu izgradnje stambeno-poslovnog objekta u ulici Dženetića čikma.



Umanjene zakupnine zanatlijama

Podsjećamo, Općinsko vijeće je još u junu, 2019. godine donijelo Zaključak o davanju saglasnosti za početak realizacije zajedničkog projekta izgradnje stambeno-poslovnog objekta u okviru UP Kvadrant XII. Akti koji su predloženi za usvajanje na prvoj redovnoj sjednici Općinskog vijeća nastavak su tih aktivnosti. Pomoćnica načelnika za imovinsko-pravne, geodetske

poslove, katastar i stambene poslove Adela Plakalo dala je iscrpno pojašnjenje kompletnog predmeta, a na pitanja vijećnika odgovarao je i v.d. općinskog pravobranioca Enes Smajlović koji je riješio sve dileme po pitanju zakonitosti. No, odluke ipak nisu dobile 2/3 većinu i samim tim nisu usvojene (19 vijećnika je bilo ZA navedene odluke, deset je bilo suzdržano, a dva su bila odsutna).

## 2. sjednica

### Općinskog vijeća

Općinsko vijeće Stari Grad je na drugoj redovnoj sjednici, održanoj 11. februara, 2021. godine, usvojilo prijedlog budžeta Općine Stari Grad za 2021. godinu u iznosu od 24.527.060 KM.

Na sjednici su usvojeni i prijedlog Odluke o izvršenju budžeta za 2021. godinu, Izvještaj o realizaciji budžeta od 01.01. do 30.09.2020. godine, prijedlog Odluke investiranja raspoloživih sredstava Općine Stari Grad za 2021. godinu i prijedlog Odluke o imenovanju investicionog menadžera Općine za 2021. godinu. Treba naglasiti da je predlagač budžeta, općinski načelnik mr.Ibrahim Hadžibajrić prethodno u više navrata kazao da će, ukoliko ovakva situacija izazvana pojavom Covid 19 potraje, većinu sredstava preusmjeriti socijalno najugroženijim građanima, jer građani uvijek trebaju biti na prvom mjestu.



Usvojen budžet za 2021. godinu


## 3. sjednica

### Općinskog vijeća

Treća redovna sjednica Općinskog vijeća Stari Grad Sarajevo održana je elektronskim putem, 25. marta, 2021. godine. Na ovoj sjednici je Vijeće usvojilo prijedloge akata iz oblasti rješavanja imovinsko-pravnih odnosa u predmetu izgradnje stambeno-poslovnog objekta u ulici Dženetića čikma bb. Sa 23 glasa ZA i 6 suzdržanih prihvaćen je prijedlog odluke o isplati naknade Malini Rašel rođ. Baruhović, zatim prijedlog odluke kojom se prihvata prijedlog Ugovora o međusobnim odnosima između Općine Stari Grad Sarajevo i Medžlisa Islamske zajednice u Bosni i Hercegovini, te prijedlog odluke o neposrednoj zamjeni suvlasničkih dijelova nekretnina između Općine Stari Grad Sarajevo i "AMKO KOMERC" d.o.o. Sarajevo.

Usvojen je i prijedlog dva nova člana Općinske izborne komisije Stari Grad. Nakon provedene konkursne procedure najviše bodova za članove OIK-a Stari Grad imali su Safija Šehović i Nevzeta Mulalić, te je usvojeno rješenje o njihovom imenovanju u OIK Stari Grad.

Vijećnici su prihvatili i prijedloge akata iz oblasti privrede od kojih su najznačajniji akti kojima se dodjeljuju u zakup poslovni prostori za otvaranje punkta Hitne pomoći u Starom Gradu u ulici Tekija čikma, dodjela dodatnih prostorija Udruženju Pomozi.ba u ulici Mula Mustafe Bašeskije 9, kao i dodjela prostorija Udruženju Taxi 8 na Kovačima koje posjeduje specijalizirana taxi vozila za osobe s invaliditetom.



Sjednica održana elektronskim putem

## Projekti

# Saradnja Općine i Pomozi.ba: Otvoren prvi "Restoran dobre volje" u Sarajevu

**Hadžibajrić i Karalić potpisali memorandum o saradnji • Besplatni obroci za socijalno ugrožene građane • Pomozi.ba dnevno servira 10.000 obroka**



Hadžibajrić i Karalić potpisali Memorandum o saradnji

Potpisivanjem Memoranduma o saradnji između općinskog načelnika mr Ibrahima Hadžibajrića i predsjednika Udruženja Pomozi.ba Elvira Karalića ozvaničena je saradnja ovih ustanova na otvaranju prvog 'Restorana dobre volje' u Sarajevu koji je 03. februara, 2021. godine počeo sa radom. Ovaj restoran namijenjen je socijalno ugroženim kategorijama koje će se potpuno besplatno posluživati obrocima u restoranu ili ponijeti obrok kući. Radi se o potpuno drugačijem konceptu javne kuhinje gdje je na prvom mjestu dostojanstvo ljudi i kvalitet obroka. Ovo je restoran u kojem se ljudi koji nemaju dovoljno novca neće osjećati ugroženima i drugačijim od onih koji imaju, već upravo suprotno.

## Općina će i druge prostore staviti u društveno korisne svrhe

Nadležne službe Općine Stari Grad će Udruženju Pomozi.ba biti na raspolaganju za usklađivanje evidencije socijalno ugroženih, razmjenu informacija, zajedničke projekte, ali i unaprjeđenje mreže socijalne zaštite. A, da ima potrebe za ovakvim restoranom potvrdio je i općinski načelnik mr Ibrahim Hadžibajrić koji je kazao da su pregovori oko ovog projekta počeli prije godinu dana, zahvaljujući tadašnjem kantonalnom ministru, a danas zamjeniku predsjedavajućeg Općinskog vijeća Stari Grad Maliku Garibiji. Općina je dodijelila Udruženju Pomozi.ba prostorije za otvaranje ovog restorana prekoputa Gradске tržnice. "Ovo je jedan vid saradnje

između vladinog i nevladinog sektora i mi ćemo u narednom periodu realizovati još dva do tri projekta, a o kojima ćemo vas obavijestiti na vrijeme i pozvati na otvorenje još jednog sličnog objekta, ali

### Restoran radi od 08,00 do 16,00 sati

'Restoran dobre volje' nalazi se u ulici Mula Mustafe Bašeskije broj 7 (bivša Semberija) i radi od 08,00 do 16,00 sati, a izdavanje obroka za one koji ih žele ponijeti kući vrši se od 11,00 do 15,00 sati. Građani mogu doći i prijaviti se za obrok, te ga dobiti u tom trenutku, a udruženje Pomozi.ba izvršit će provjeru podataka koje dostave kako bi se vodilo računa da obrok dobijaju oni kojima je zaista potreban.



**Pomozi.ba** dnevno servira oko 10.000 obroka

malo drugačije namjene. Općina Stari Grad ima ovakvih prostora koje ćemo iskoristiti u društveno korisne svrhe, da pomognemo građanima, jer živimo u dosta teškom vremenu,” izjavio je načelnik Hadžibajrić.

### Cilj je pomoći ljudima i očuvati dostojanstvo

Elvir Karalić je istakao da je sretan zbog ove saradnje, te ponovio da je prvi Restoran dobre volje otvoren u Travniku, nakon toga u Bihaću, a sada i u Sarajevu za koji su se posebno pripremali jer se nalazi u općini Stari Grad, u srcu Sarajeva.

„Cilj nam je pomoći ljudima, očuvati dostojanstvo ljudi i kada izađu iz ovakvog objekta da se ne osjećaju manje vrijednim u odnosu na nekog drugog koji je imao novac da sebi kupi pitu ili slično. To je smisao kompletne ove priče,” pojasnio je Karalić. Iznio je podatak da se kroz javne kuhinje u Sarajevu dnevno podijeli oko 2.000 obroka, tako da svakako ima potrebe za ovakvim restoranom „Pomozi.ba ima ukupno šest svojih kuhinja, za naše ljude i ono što radimo s EU za migrante. Dnevno serviramo oko 10.000 obroka što je zaista velika cifra,” kazao je.



*Garibija, Karalić, Hadžibajrić i Batalović*



*Restoran u obnovljenom prostoru u ulici Mula Mustafe Bašeskije*

## Infrastruktura

# Pri kraju radovi na velikom infrastrukturnom projektu na Mahmutovcu

**Nakon obustave u zimskom periodu, radovi nastavljani početkom marta ● Završena ugradnja kanalizacionih cijevi ● Dužina vodovodne mreže na kojoj se radi 250 metara**

**P**očetkom marta ove godine nastavljani su radovi na velikom infrastrukturnom projektu u ulicama Kamenica i Paje malta koje se nalaze u mjesnoj zajednici Mahmutovac. Podsjećamo da je u dijelovima ulica Kamenica i Paje malta, sredinom novembra prošle godine počeo projekat rekonstrukcije kanalizacione i vodovodne mreže, vrijedan 580.000 KM. Za stanovnike ovih ulica to će značiti kraj problemima sa lošim podzemnim instalacijama, vodovodnim i kanalizacionim cijevima i ispucalim asfaltom, a samim tim i stvaranje boljih uslova za život.

S dolaskom zimskog perioda i loših vremenskih uslova obustavljeni su radovi na ovoj lokaciji, a dotad je završena ugradnja kanalizacionih cijevi u ulici Kamenica i dijelu ulice Paje malta, dužine oko 210 metara, zatim u kraku ulice Kamenica dužine oko 90 metara, te u dijelu putnog pravca Kamenica - Sulejmana Zolja u dužini od oko 20 metara, potvrđeno je iz Službe za investicije i komunalne poslove Općine Stari Grad Sarajevo.

## Nastavljeni radovi

Izvođač radova firma 'Bujice' d.o.o. iz Konjica nastavila je sa radovima koji su predviđeni projektom. Sa firmom KJKP 'Vodovod i kanalizacija' usaglašena je trasa polaganja vodovodnih cijevi, te je dogovoreno da zbog položaja novog cjevovoda nema potrebe za polaganjem



*U toku zamjena vodovodnih instalacija*

privremenog voda. „Trenutno se izvode radovi na polaganju cijevovoda fi 100, a nakon toga će biti izvršena rekonstrukcija kućnih priključaka do vodomjera. Dužina glavnog cjevovoda je oko 230 metara, a planira se i rekonstrukcija 25 kućnih priključaka“, naglašavaju iz Službe.

## Šta je planirano u okviru projekta

Pored ugradnje novih kanalizacionih cijevi na cijeloj trasi, do sada su izgrađena i 22 ulična šahta od planiranih 26, te su svi objekti priključeni na kanalizaciju. Također je na trasi izgrađen i jedan manji potporni zid, kojim se dodatno stabilizovala saobraćajnica, jer je postojeći zid bio oštećen. Inače, kompletan projekat

uključuje novu kanalizacionu mrežu na trasi dugoj 330 metara. Što se tiče vodovodne mreže, ona će podrazumijevati zamjenu starih i dotrajalih instalacija na kojima su bili česti kvarovi i svakodnevni prokopi radi popravki, što je dodatno uništavalo ionako lošu saobraćajnicu. Dužina vodovodne mreže koja će se rekonstruisati je oko 250 metara. Pored toga, na dijelu trase planirano je i polaganje drenažnih cijevi da bi se dio podzemnih voda koje na ovom području ugrožavaju objekte odveo u sistem oborinske odvodnje i bit će urađeno oko 30 pojedinačnih priključaka na domaćinstva. Kada se okončanju podzemni radovi, uslijedit će asfaltiranje svih dionica, što će itekako podići kvalitet života u ovom dijelu Starog Grada.

## U završnoj fazi rekonstrukcija Vrtića "Bulbuli"

Rekonstrukcija Vrtića Bulbuli, devastiranog za vrijeme agresije na naš grad, počela je u augustu prošle godine. Izvedeni su građevinski radovi u unutrašnjosti, radovi na krovnoj konstrukciji, montiran solarni sistem na krovu objekta, uvedeno radijatorsko i podno grijanje, postavljene nove elektroinstalacije u cijelom objektu, postavljena hidroizolacija u prizemlju objekta, postavljena keramika u toaletima, objekat je spojen na sistem vodovoda i kanalizacije, te je saniran potporni zid s gornje strane objekta.

Trenutno se izvodi završna faza radova koja

uključuje vanjsko uređenje. Radi se rekonstrukcija velikog potpornog zida koji se nalazi na glavnom ulazu u Vrtić "Bulbuli". Zid se nalazi uz ulazno stepenište u dvorište, iz ulice Hulusina i njegova rekonstrukcija bila je neophodna kako bi se kompletirao projekat rekonstrukcije cijelog vrtića. Vanjsko uređenje, osim pomenutog zida, uključuje i dječije igralište koje se gradi s gornje strane objekta.

Projekat finansiraju Općina Stari Grad i Ministarstvo za obrazovanje, nauku i mlade KS-a iznosom od 964.000 KM.





## U 23 ulice iz osam mjesnih zajednica uvedeno dvolinijsko prikupljanje otpada

U mjesnim zajednicama Kovači, Mošćanica, Vratnik, Sumbuluša, Hrid - Jarčedoli, Širokača, Mahmutovac i Medrese uveden je novi sistem prikupljanja otpada. Riječ je o projektu 'Dvolinijski sistem otpada u starogradskim domaćinstvima' kojeg su zajednički finansirali Općina Stari Grad i Fond za zaštitu okoliša FBiH. Vrijednost projekta je 62.500 KM, Fond za zaštitu okoliša FBiH finansirao ga je sa 50.000 KM a Općina Stari Grad sa 12.500 KM.

Iz Službe za lokalni razvoj i poslove mjesnih zajednica pojasnili su da je Općina Stari Grad za ulice u kojima su distribuirane kante dobila saglasnost KJKP „RAD“, koje je i nadležno za odvoz komunalnog otpada. „Prikupljanje otpada na ovakav način moguće je samo u ulicama koje imaju dovoljnu širinu i gdje je moguć prolazak većeg kamiona koji prazni otpad iz ovih kanti“, kazali su iz Službe.

### Podijeljeno 1.980 kanti za dvolinijski otpad

Projektom je nabavljeno 990 kompleta, odnosno 1.980 kanti za dvolinijski odvoz smeća i raspoređene su u svim mjesnim zajednicama gdje je postojala

potreba i gdje je to bilo moguće. Svako domaćinstvo je dobilo komplet od po dvije kante, crnu i žutu. Crna kanta namijenjena je za prikupljanje kućnog komunalnog otpada i praznit će se dva puta sedmično (utorkom i subotom), a žuta kanta namijenjena je za reciklažni otpad i praznit će se jednom sedmično (četvrtkom).

Projektom su obuhvaćene sljedeće ulice: Džinina (55 kompleta), Očaktanum (77 kompleta), Ablagijin sokak (54 kompleta), Streljačka (63 kompleta), Ploča (25 kompleta), Saburina (29 kompleta), Hadžijamakova (76 kompleta), Mustafe Dovadžije (45 kompleta), Carina (30 kompleta), Vratnik mejdan (46 kompleta), Močila (70 kompleta), Močila terezija (25 kompleta), Bajramuša (45 kompleta), Mahmutovac (30 kompleta), Za beglukom (40 kompleta), Hambina carina (58 kompleta), Nadmejdani (15 kompleta), Hadžiabdinica (12 kompleta), Širokac (15 kompleta), Kasima efendije Dobrače (24 kompleta), Požegina (50 kompleta), Čopinica (10 kompleta) i Nova Baruthana (96 kompleta).

Podjelu kanti za otpad na kućne adrese građana izvršilo je Odjeljenje za održavanje Aleje ambasadora, cestovnih pojasa i javnih površina, koje djeluje pri Službi za investicije i komunalne poslove Općine Stari Grad.

## Riješen problem izljevanja otpadnih voda u ulici Ramića banja



Sekundarni kanal mreže

U ulici Ramića banja uspješno su izvedeni radovi na rješavanju problema izljevanja otpadnih voda iz individualnih objekata na ulicu. Ovaj problem su građani mjesne zajednice Sedrenik delegirali kao jedan od prioriteta na području ovog naselja prilikom „Prijema građana na otvorenom“ koji su prošle godine organizovani za sve mjesne zajednice.

Iz nadležne Službe za investicije i komunalne poslove Općine objašnjavaju da je ovaj problem nastao zbog neodgovornog odnosa pojedinaca, a što je u konačnici ugrožavalo zdravlje ljudi u pomenutom naselju. Naime, iz priključnih kanalizacionih instalacija, otpadne vode su se izljevale na veoma prometnu ulicu koja predstavlja jedinu saobraćajnu komunikaciju prema školi, ambulanti i drugim ustanovama bitnim za svakodnevni život građana.

„Iako kroz korito Ramića potoka prolazi kanalizacioni kolektor na koji je moguće putem KJKP „Vodovod i kanalizacija“ Sarajevo izvršiti priključenje, pojedini građani otpadne vode iz svojih objekata ispuštaju u Ramića potok što je nedopustivo ponašanje“, pojašnjavaju.

Kako bi se zaštitili ostali građani koji su se tuđom krivicom našli u nezavidnom položaju, odlukom općinskog načelnika izdvojena su budžetska sredstva za sanaciju ovog problema i izgradnju sekundarnog kanala.

„Da bismo riješili navedeni problem izgrađen je sekundarni kanal lokalne kanalizacione mreže u dužini od oko 15 metara, te priključni šaht na kanalu kojim su se otpadne vode kontrolisano 'odvele' u kanalizacioni kolektor“, kazali su iz Službe. Za ove radove Općina Stari Grad izdvojila je oko 7.000 KM.

## Obrazovanje



# Načelnik Hadžibajrić nagradio 'zlatne' i 'srebrene' studente iz Starog Grada

**Diplome i novčane nagrade od 500 i 300 KM ● Pružiti mladim ljudima uslove za normalan rad, napredak i život ● Podrška institucija i sistemsko zapošljavanje**

Općinski načelnik mr Ibrahim Hadžibajrić nagradio je 04. februara, 2021. godine studente iz općine Stari Grad koji su dobili najviša priznanja Univerziteta u Sarajevu – zlatne i srebrene značke, za izuzetne rezultate i visok prosjek ocjena za vrijeme prvog ili drugog ciklusa studija. Ovim uspješnim mladim ljudima uručene su diplome i novčane nagrade, a prijem studenata svojim je prisustvom uvećao i rektor Univerziteta u Sarajevu prof.dr. Rifat Škrijelj koji nije krio oduševljenje i riječi hvale za ovaj potez načelnika Hadžibajrića.

Obraćajući se studentima načelnik Hadžibajrić kazao je da je ovo nagrada za sav trud koji su uložili tokom školovanja. „Koliko se mojim dolaskom na čelu ove institucije povećao iznos za naše učenike i studente govori podatak da se davne 2008. godine godišnje izdvajalo nekih 72.000 KM, a sada je taj iznos blizu 400.000 KM“. To je znatno više od nekih drugih općina koje se mogu pohvaliti mnogo većim budžetom od onog kojim raspolaže Općina Stari Grad, dodao je.

## Primjer da ova zemlja ima kapacitet

Za predsjedavajućeg Općinskog vijeća Stari Grad dr.sc. Mirzu Batalovića ovi mladi ljudi predstavljaju najveće blago Bosne i Hercegovine: „Vi mladi ljudi ste primjer da ova zemlja ima kapacitet. Uz funkciju predsjedavajućeg Općinskog vijeća, radim i kao profe-

sor na Elektrotehničkom fakultetu u Sarajevu. Strašno mi je žao kada student završi Elektrotehnički fakultet, pa se pokaže da ne treba ovoj zemlji, a treba Švicarskoj. Želim da ljudi poput vas ostanu ovdje, a čovjek kao što je načelnik Hadžibajrić, će pokušati da vas veže za Bosnu i Hercegovinu i pruži uvjete za normalan rad, napredak i život“, kazao je studentima predsjedavajući Batalović.

### Zlatne i srebrene značke

Svi studenti zlatne značke dobili su po 500 KM, a srebrene značke po 300 KM. Diplome i novčane nagrade su dobili: Ena Muhić (Pravni fakultet, prosjek ocjena 9,53 – Zlatna značka); Nejra Memedi (Filozofski fakultet, prosjek ocjena 9,94 – Zlatna značka); Kemil Bekteši (Akademija likovnih umjetnosti, prosjek ocjena 9,54 – Zlatna značka); Amna Pezo (Fakultet zdravstvenih studija, prosjek ocjena 9,38 – Srebrna značka); Dženana Tatlić (Šumarski fakultet, prosjek ocjena 9,34 - Srebrna

značka); Kamber Kamberi (Fakultet islamskih nauka, prosjek ocjena 9,31 - Srebrna značka), Aida Adžović (Muzička akademija, prosjek ocjena 9,20 - Srebrna značka); Anes Gugić (Fakultet političkih nauka, prosjek ocjena 9,17 - Srebrna značka), Lamija Vrnjak (Elektrotehnički fakultet, prosjek ocjena 9,16 - Srebrna značka), Nejra Hadžić (Pedagoški fakultet, prosjek ocjena 9,16 - Srebrna značka) i Amina Kadrić (Medicinski fakultet, prosjek ocjena 9,02 -Srebrna značka).



## Škrijelj: Bitno je da mladi ljudi imaju podršku institucija

Prijemu studenata prisustvovao je i prof.dr. Rifat Škrijelj, rektor Univerziteta u Sarajevu. U svom obraćanju izrazio je veliku zahvalnost općinskom načelniku mr Ibrahimu Hadžibajriću što je u svojoj lokalnoj zajednici prepoznao i nagradio uspješne mlade ljude. „Velika je radost mene kao rektora Univerziteta u Sarajevu da postoji načelnik koji svoje učenike i studente prati, stipendira i nagrađuje. Vrlo je bitno da mladi ljudi imaju podršku institucija svojih mjesnih područja. Naša država mora čuvati kao najvrijednije dragulje ove vrhunske studente, da ih sistemski zapošljava“, kazao je rektor Škrijelj.



*Rektor Univerziteta u Sarajevu Rifat Škrijelj sa načelnikom Hadžibajrićem*

## Podrška učenicima deficitarnih zanimanja – potpisani ugovori o stipendijama

Općinski načelnik mr Ibrahim Hadžibajrić potpisao je 17.03.2021. godine ugovore sa učenicima iz Starog Grada koji su se odlučili za deficitarna zanimanja kao što su: keramičar, podopolagač, tapetar, mesar itd. Ovi učenici dobili su stipendije za školsku 2020/21. godinu kako bi im se pomoglo u školovanju, ali istovremeno podstaklo i druge mlade ljude da se bave zanatima, posebno starim, tradicionalnim.

Stipendiranje učenika deficitarnih zanimanja i starih tradicionalnih zana-

ta Općina Stari Grad uvela je prije pet godina, no i pored toga nema mladih ljudi koji bi se opredijelili za tradicionalne zanate. Kako je potvrdio općinski načelnik mr Ibrahim Hadžibajrić, ova jedinica lokalne samouprave spremna je i da poveća sredstva za ove stipendije ukoliko bi se učenici više odlučivali za stare i deficitarne zanate.

“Želim poručiti svim mladim ljudima koji se opredijele za deficitarne zanate, posebno tradicionalne, da je Općina Stari Grad otvorena za njih i stipendi-

rat ćemo ih i ubuduće. Ako bude i više zainteresovanih mi ćemo se potruditi da ih podržimo i osiguramo stipendije,” poručio je načelnik Hadžibajrić. Dodao je kako je siguran da će za ove mlade ljude u budućnosti biti posla.

“Za ovu djecu sam siguran da će u budućnosti imati posla jer mi već sada oskudijevamo sa deficitarnim zanimanjima u Sarajevu, pa i cijeloj BiH jer, nažalost, puno naših ljudi koji znaju raditi ove poslove odlazi u inostanstvo,” kazao je.



## Podrška



## Povodom Svjetskog dana svjesnosti o autizmu: **Priča hrabre majke Elme i njenog sina Ejmena**

**Sa 15 mjeseci Ejmen počinje gubiti riječi koje je znao i kreću pregledi • Senzorna soba mnogo pomaže djeci s autizmom • Uključen u školu plivanja i školu skijanja**

**P**ovodom svjetskog dana svjesnosti o autizmu koji se širom svijeta obilježava 02. aprila, u ovom broju 'Starogradskih habera' donosimo priču o hrabrom dječaku Ejmenu i njegovoj super-mami Elmi, koji se uprkos svim nedaćama koje je život stavio pred njih, hrabro nose sa svakim novim danom i novim izazovima.

### Sa navršenih 2,5 godine dijagnoza 'sumnja na autizam'

Autizam je neurobiološki razvojni poremećaj koji se javlja u ranom djetinjstvu, obično prije treće godine života. Zahvata gotovo sve psihičke funkcije i traje cijeli život. Ova bolest pogađa otprilike 1% djece i obuhvata širok raspon poremećaja: od teških, preko umjerenih do blagih. Kod polovine autistične djece poremećaj utiče na intelektualne

sposobnosti, a oko 10 posto njih nikada ne uspije savladati govor.

Svaka bolest je teška, ali za jednu majku neme veće životne brige i tuge nego što je zdravlje njenog djeteta. Kada se roditelj suoči sa dijagnozom 'sumnja na autizam' u tom trenutku sruši se cijeli njegov svijet, pomiješaju osjećaji, a u glavi se 'roji' na stotine pitanja. Od toga 'kako i zašto', do 'zašto baš meni' i 'šta sad'? Elma Kurtanović doživjela je ovo strašno iskustvo kada je njenom Ejmenu bilo 2,5 godine i od tada traje njihova svakodnevna borba. Danas ovaj hrabri dječak ima 13 godina, pohađa Zavod Mjedenica, naučio je plivati kroz školu plivanja, a pohađao je i školu skijanja. Za njih je svaki dan borba, ali hrabro idu dalje i nikada ne posustaju.

"Ejmen je dijete iz prve i željene trudnoće," započinje svoju priču majka Elma. "Sve se uredno odvijalo do njegovih navršenih 15 mjeseci. Rano je prohodao, a sa 11 mjeseci samostalno je prelazio pragove u kući i bio radoznala beba. Počele su i prve riječi ma-ma, ba-

ba, pa-pa, sa mahanjem ručice," prisjeća se Elma. A, onda se iznenada sve promijenilo kada je Ejmen napunio 15 mjeseci.

"Sa navršenih 15 mjeseci više nije bilo novih riječi i Ejmen počinje gubiti i riječi koje je znao. Došlo je do totalne re-



Vježbe s logopedom

gresije, i po uputi pedijatrice krenuli smo s pregledima. Medicinski nalazi, sluh i MRI mozga u početku su bili uredni, ali sa navršениh 2,5 godine Ejmen već dobija dijagnozu “sumnja na autizam”.

Elma priznaje da o autizmu nije znala gotovo ništa i kao i svaki roditelj, nakon prvobitnog straha i šoka, krenula je u istraživanje ove bolesti. “Očajnički čitajući na internetu o autizmu došla sam u fazu koju možda svi prolazimo: od ljutnje, skrhanosti bolom, pitanja zašto baš meni, do pomirenja da nam se to desilo i da moram biti jaka, jača nego ikada i da jedino tako mogu pomoći svom djetetu,” priča Elma.

## Senzorna soba od velikog značaja za osobe s autizmom

Ejmen je prošao ranu intervenciju u Udruženju za unapređenje obrazovanja i podrške djeci sa i bez poteškoća u razvoju EDUS. Osnovno školovanje je nastavio u Zavodu Mjedenica, gdje je prema riječima majke Elme sretniji nego u redovnoj školi jer nema diskriminacije i niko ga ne gleda drugim očima. U Zavodu Mjedenica se Ejmen odlično snalazi, a Elma ima samo riječi hvale za ovu ustanovu, kao i za Općinu Stari Grad i općinskog načelnika mr Ibrahima Hadžibajrića zbog nesebične podrške brojnim projektima Zavoda. Na prvo mjesto Elma stavlja Senzornu sobu koju je općinski načelnik Hadžibajrić otvorio u junu, 2018. godine i za koju je iz budžeta izdvojena 21.000 KM.

“Zahvaljujući razumijevanju i podršci načelnika Hadžibajrića u Zavodu je otvorena ‘Senzorna soba’ koju moj Ejmen jako voli jer ga opušta. Koriste je svi štićenici Mjedenice jer im boravak u Senzornoj sobi omogućava da razvijaju senzorne vještine koje će im olakšati život. Stimulirajuća i smirujuća atmosfera omogućava našoj djeci poboljšanje koordinacije, unapređuje sposobnost komunikacije, djeluje relaksirajuće na dječicu koja su stalno u pokretu i usmjerava im pažnju. Zato sam neizmerno zahvalna načelniku što nam je pomogao,” ispričala je Elma.

No, pored Senzorne sobe, Elma ističe i značaj logopedskih tretmana koje imaju štićenici ovog Zavoda, a koje također finansira Općina Stari Grad. “Ne mogu a



Načelnik Hadžibajrić na otvaranju Senzorne sobe

da ne spomenem i logopedске tretmane koji se provode u Zavodu Mjedenica, a koje također finansira Općina. To nam je jako značajno i moj Ejmen je od tih tretmana imao dosta koristi. O tim stvarima se ne priča puno, a ja kao majka želim da se zahvalim onima koji su zaslužni za dobrobit naše djece – Zavodu Mjedenica i načelniku Hadžibajriću.”

## Potrebno je sistemsko rješenje za osobe s autizmom i njihove porodice

Trinaestogodišnji Ejmen uključio se i u školu plivanja koju je realizovao Plivački klub „Spid“ kroz projekat „Inkluzivna škola sporta“. Još od 2017. godine Plivački klub „Spid“ zahvaljujući Općini Stari Grad i međunarodnim partnerima pruža priliku djeci sa invaliditetom da nauče plivati i uživati u ovom sportu. U okviru projekta je realizovana škola skijanja, preventivno-korektivne gimnastike, te škola plivanja za djecu s invaliditetom.

Generalna skupština UN-a proglasila je 02. april Svjetskim danom svjesnosti o autizmu, čime se želi skrenuti pažnja javnosti širom svijeta na sve veći problem ovog složenog poremećaja koji se kod pojedinaca najčešće razvije u prve tri

godine života i uglavnom traje do kraja života. Svjetska nauka je, zahvaljujući pronalascima s područja genetike, neurologije i drugih nauka mnogo toga spoznala o faktorima povezanim s autizmom, ali još nije u potpunosti razjasnila zbog čega nastaje navedeni spektar poremećaja. Prema rezultatima brojnih istraživanja, osobe s autizmom i njihove porodice posebno su ranjiv dio populacije koji zahtijeva sistemski rješenja i kontinuiranu podršku.

### Zahvalnica svih roditelja djece s invaliditetom

Predsjednik PK Spid Amer Kapo, prošle godine je u ime svih roditelja djece sa invaliditetom iz Starog Grada, a koja su uključena u programe ovog društva, uručio je specijalnu zahvalnicu općinskom načelniku mr Ibrahimu Hadžibajriću.



## Predstavljamo



# Paja taxi, firma sa Širokače sa poslovnim iskustvom od 17 godina

**Iskustvo u taxi prevozu duže od 25. godina ● Suština poslovanja je zadovoljstvo putnika ● Vozila ove firme godišnje prelaze više od 2.200.000 kilometara, vozeći kroz najfrekventnije zone glavnog grada BiH**

**F**irma „Paja taxi“ jedan od uspješnih poslovnih subjekata iz općine Stari Grad, posluje već 17. godina i danas broji više od 40 uposlenih.

Sa sjedištem na Širokači, u ulici Brajkovac, ova firma postala je jedan od prepoznatljivih brendova, a od početka svog rada gajili su viziju kvalitetnog prevoza na zadovoljstvo svojih korisnika.

Građanima su na raspolaganju 24 sata dnevno, svih 365 dana u godini, a kao što svi znamo, taxi uslugama okrećemo se i u najboljim i najgorim životnim okolnostima. Taxi prevoz je ono što građanima treba bez obzira na doba dana, godine, vremenske uslove, praznike, radost ili žalost. Baš zato, važno je pružiti uslugu u pravo vrijeme i postići da korisnici uvijek budu zadovoljni i imaju siguran prevoz.

Vozila Paja taxi-ja godišnje prelaze više od 2.200.000 kilometara, vozeći kroz najfrekventnije zone glavnog grada Bosne i Hercegovine. Njihova vozila prepoznatljiva su po svojoj

### Kvalitetna i sigurna usluga, udobna vozila

Almir Karišik je neko ko zadovoljstvo korisnika stavlja na prvo mjesto, a kako bi to postigao provodi anketiranje. Prema internom istraživanju koje su uradili 2019. godine čak 100% ispitanika potvrdilo je da imaju kvalitetnu uslugu, 98% ispitanika potvrdilo je da su im vozila udobna i prostrana za dodatni prtljag, te su uslugu uposlenika ocijenili sa visokih 100%.



*Sjedište firme u ulici Brajkovac*

boji u kombinaciji s crnim kvadratićima, izuzetno komforna, i uglavnom su to vozila novije generacije marke Škoda i Volkswagen.

## Paja taxi 1522

„Suština našeg poslovanja je zadovoljstvo naših putnika, zato svakodnevno radimo na unapređenju usluge u skladu sa njihovim zahtjevima i potrebama. Njihovo mišljenje izuzetno nam je važno, te redovno radimo ispitivanja kako bismo dobili direktne informacije kojim se vodimo i dalje unapređujemo usluge“, kazao je Almir Karišik, vlasnik firme.

Sjedište firme nalazi na lijevoj strani Miljacke, na padinama Trebevića u ulici Brajkovac. „Bez obzira što nam je sjedište u Starom Gradu naša vozila podjednako se mogu vidjeti i u ostalim dijelovima grada od aerodroma do planina koje okružuju grad Sarajevo“, priča Almir.

Kako ističe, imaju velike planove za budućnost i odnose se na modernizaciju poslovanja, ali imajući u vidu da je već godinu dana cijeli svijet u nezapamćenoj pandemiji izazvanom korona virusom, ti

planovi će još sačekati na realizaciju.

Pandemija ih je naučila i kako da rade u otežanim okolnostima. Za vrijeme potpunog lockdowna prošle godine, kada je obustavljen gradski prevoz, Almir kaže da su se snašli i prilagodili novonastaloj situaciji.

„Naša prednost je u tome što smo se u vrlo kratkom vremenskom periodu organizovali u skladu sa situacijom koja nas je zatekla. Prioritet nam je bio zaštita uposlenika i korisnika naših usluga.

### Brzi servis, auto dijagnostika i vulkanizerski poslovi

Pored osnovne usluge taxi prevoza, u sklopu firme Paja d.o.o. nalazi se i kompletan servis, autopraonica i dispečer centar. Nude i druge usluge i to: brzi servis, auto dijagnostiku i vulkanizerske poslove. U mogućnosti su da ponude i najam reklamnog prostora sa opcijama vanjskog i unutrašnjeg oglašavanja u 15 vozila firme Paja taxi. Njihova vozila dnevno prevezu više od 900 putnika na području Sarajeva.

Proveli smo sve potrebne mjere zaštite sa detaljnom dezinfekcijom vozila, tako da se u našim vozilima svi građani mogu osjećati sigurnim“, poručuje Almir. Njihov slogan je „Brzo i sigurno do vaše adrese“, a u svako doba dana građani ih mogu dobiti putem broja 1522.



Prepoznatljivi po sivoj boji vozila



## Pobratimske općine

# Općina Karpoš - Prijatelj iz prijestolnice Sjeverne Makedonije

**Stari Grad i Karpoš pobratimske općine od 2011. godine • Ime Karpoš ima veliku simboliku za Makedonce • Dječije igralište u ulici Logavina izgrađeno zahvaljujući prijateljstvu dvije općine**

**N**akon što je u prethodnim izdanjima Starogradskih habera predstavljeno čak osam pobratimskih općina iz Republike Turske, u ovom 49. broju „Habera“, čitatelje upoznajemo sa Općinom Karpoš iz Skoplja, glavnog grada Republike Sjeverne Makedonije.

Sve je počelo u martu 2011. godine kada su se u Sarajevu prvi put susreli općinski načelnik mr Ibrahim Hadžibajrić i tadašnji načelnik Općine Karpoš Stevče Jakimovski. Na sastanku je dogovoreno da se u što skorijem roku ozvaniči saradnja Starog Grada i Karpoša, koja će se bazirati na afirmaciji kulture, sporta, ali i na poslovno-tehničkom planu. Iste te godine, i to na najsvečanije Dane Općine Stari Grad početkom maja, općinski načelnik mr Ibrahim Hadžibajrić i predsjedavajući Općinskog vijeća Karpoš Trifun Trifunovski potpisali su Sporazum o bratimljenju u Sarajevu.

## Dom Kliničkog centra, glavnog gradskog parka i stranih ambasada

Općina Karpoš jedna je od ukupno deset gradskih općina Skoplja, glavnog grada Republike Sjeverne Makedonije. Zauzima 105 km<sup>2</sup> zapadnog dijela Skoplja, a svojim istočnim granicama se naslanja na centralne gradske općine Centar i Čair, koje su kulturno-historijsko jezgro makedonske prijestolnice. Zapadnim i sjevernim dijelom ove općine prolazi jedna od najvećih rijeka Balkana, Vardar. Više od 60.000 stanovnika Skoplja živi u Karpošu, a zbog svog ravničarskog terena dominiraju visoke stambene zgrade i široki bulevari koji su izgrađeni 70-ih i 80-ih godina prošlog stoljeća. U Karpošu se nalaze neke od najvažnijih institucija za Sjevernu Makedoniju, a to su prije svega Klinički centar „8. septembar“, Institut za respiratorne bolesti, Sportski centar i dvorana „Boris Trajkovski“, Zoološki vrt, Skoplje City Mall, Glavni gradski park, te ambasade Njemačke i Austrije.

Ovaj dio Skoplja je i prije zvanično formiranja lokalne samouprave 1976. godine dugo vremena nosio naziv Karpoš, i to



*Karpoš, jedna od devet gradskih općina Skoplja*

po Petru Karpošu. Petar Karpoš je bio vođa velikog ustanka protiv osmanske vladavine u 17. stoljeću. Ustanak je ugušen, a Karpoš 1689. godine pogubljen i bačen u rijeku Vardar. U vremenu koje je uslijedilo ime Karpoš je postalo simbol težnje makedonskog naroda za slobodom, sopstvenom državom i nacionalnim identitetom. Iz tog razloga Hristijanu Todorovskom, legendarnom partizanskom komandiru iz Drugog svjetskog rata dat je nadimak Karpoš. Hristijan Todorovski Karpoš uspješno se borio protiv bugarskih snaga koje su okupirale Makedoniju u to vrijeme. U jednoj takvoj akciji je izgubio život 1944. godine. Hristijan Todorovski Karpoš je makedonski nacionalni heroj i danas, a po njegovom imenu su nazvane škole, ulice, udruženja, institucije i bulevari.

## Zajednički projekat: Dječije igralište u ulici Logavina

Općina Stari Grad i Općina Karpoš od prvog dana držali su se principa potpisanog sporazuma iz maja 2011. godine. U više navrata osnovci iz Starog Grada odlazili su u Karpoš na likovna i sportska takmičenja. Učenici iz Karpoša su imali priliku posjetiti Stari Grad 2014. godine. Delegacije ove dvije pobratimske lokalne samouprave redovno su se susretale u Starom Gradu za vrijeme Dana




*Hadžibajrić i Trifunovski*



*Finansirali igralište u Logavinoj*

Općine Stari Grad u mjesecu maju, odnosno u Karpošu u novembru, kada se obilježava Dan Općine Karpoš.

Zahvaljujući odličnim odnosima općina Stari Grad i Karpoš, najmlađi stanovnici ulice Logavina, ali i ostalih obližnjih naselja, dobili su potpuno novo dječije igralište. Krajem septembra 2016. godine ispred Doma kulture Logavina svečano je otvoreno igralište za djecu. Općina Karpoš donirala je 15.000 eura za gradnju i mobilijar, dok je Općina Stari Grad pružila svu administrativnu podršku.



| Naziv institucije              | Telefon                |
|--------------------------------|------------------------|
| Policija                       | 122                    |
| MUP Stari Grad                 | 033/ 532-000           |
| Hitna pomoć                    | 124                    |
| Vatrogasci                     | 123                    |
| Taxi Sarajevo                  | 1515                   |
| Turistički informativni centar | 033/ 532-606 i 580-999 |
| Info centar Općine             | 033/ 233-184           |
| Mjesne zajednice               | 033/ 265-526           |
| Porezna uprava                 | 033/ 555-481           |
| Apoteka „Baščaršija“           | 033/ 272-300           |
| Biro Stari Grad                | 033/ 557-247           |
| Općina Stari Grad Sarajevo     | 033/ 282-300           |

| Općinska služba   | Telefon     |
|---|-------------|
| Služba kabineta općinskog načelnika   | 033/282-400 |
| Općinsko vijeće   | 033/282-313 |
| Služba za odnose s javnošću i informacione sisteme                          | 033/282-491 |
| Služba civilne zaštite  | 033/282-395 |
| Služba za investicije i komunalne poslove                                   | 033/282-417 |
| Služba za urbanizam   | 033/282-316 |
| Služba za imovinsko-pravne, geodetske poslove i katastar i stambene poslove | 033/282-335 |
| Služba za boračko-invalidsku i socijalnu zaštitu                            | 033/282-397 |
| Sektor za tehničke poslove i obezbjeđenje                                   | 033/282-452 |
| Služba za opću upravu i inspeksijske poslove                                | 033/282-357 |
| Služba za finansije   | 033/282-427 |
| Služba za privredu  | 033/282-359 |
| Općinsko pravobranilaštvo   | 033/282-371 |
| Služba za obrazovanje, kulturu i sport                                      | 033/282-365 |
| Služba za lokalni razvoj i poslove mjesnih zajednica                        | 033/265-525 |

-  Informacije
-  Policija
-  Parking
-  Prva pomoć
-  Toalet
-  Pošta
-  Banka



## Podjela zaštitnih maski građanima

Po nalogu općinskog načelnika mr Ibrahima Hadžibajrića, Služba civilne zaštite Općine Stari Grad izvršila je podjelu zaštitnih maski građanima na ulicama Starog Grada, a s ciljem zaštite i ukazivanja na važnost

poštovanja propisanih higijensko-epidemioloških mjera. Uposlenici Službe civilne zaštite su, uz podjelu maski, upozoravali građane i na ostale mjere koje se moraju poštovati.